

223915

更生齋集
儀鄭堂駢體文

中華書局印行



更生齋集

四部備要

集部

上海中華書局據北江遺
書本校刊

桐鄉

陸費達總勘

杭縣

高時顯輯校

杭縣

吳汝霖之監造

版權所有不許翻印

與安西州守胡紀謨書

昨據別後出州城西北行九十里至白墩子宿墩旁地勢高下沙磧中尚有廢城舊址土人居者亦不下數十家右側有泉寬二十餘步土人呼爲疏勒泉日用灌漑皆資之余時即疑漢疏勒國在龜茲之西于闐之北較爲孫等國更遠何得敦煌郡地即有疏勒泉連日車中無事取所攜前後漢書西域傳及耿恭等傳校之而知恭所屯之疏勒城實非漢疏勒國所都之城但同名耳攷前漢書西域傳疏勒國治疏勒城後漢書傳云疏勒國領戶二萬二千勝兵三萬人于西域中爲強國則都城內既有王又有疏勒侯擊胡侯以訖左右譯長等官既不一加以居民勝兵自不下數萬何以棄而不居反留空城爲恭等一二十人所據若云與疏勒國衆同城則匈奴車師不僅圍恭等并圍疏勒國君民矣匈奴既于城下擁絕澗水則一城之人必皆大困恭即能穿井得水疏勒國衆又將何飲乎恭即能棄弩作食疏勒國衆又將何食乎且自圍城已及圍解傳不涉及疏勒國一字明非疏勒國都城可知一也二則地理遠近不合恭傳言恭爲戊己校尉屯金滿城謁者關龍爲己校尉屯柳中金滿城即今奇臺縣東之古城柳中即唐柳中縣在哈密城西十里皆與今州西之疏勒泉近而與漢疏勒國城遠至二倍圖經云疏勒國去陝西省九千六百八十里古城在府西不及五百里二也三則日月遲速不合恭傳言肅宗建初元年正月秦彭等會柳中擊車師攻交河城自柳中至交河城一往一返及攻城之日至少亦須一月及車師降後乃分兵使范羌從山北迎恭又遇大雪之餘即至速亦必半月可達圍解之後且戰且行吏士又素饑困然恭傳云是年三月已至玉門則道里甚近必非自疏勒國至玉門可知三也又恭傳云發張掖酒泉敦煌三郡及鄯善兵鄯善

國在今沙州衛西與三郡皆距今州西之泉密邇當日必就近徵發四也四則南北向背不合交河城即今土魯番在雪山之北今疏勒泉亦在南北而疏勒國遠在雪山之南若恭果據疏勒國城則當使范羌從山南迎恭何得反從山北此又一顯證矣五也又與班超傳彼此情形不合超傳建初三年上疏言臣孤守疏勒于今五載自建初三年上溯至永平十七年方及五載校恭傳被圍之日正在永平十八年及建初元年且超傳言永平十八年帝崩焉書以中國大喪遂攻沒都護陳龍超孤立無援而龜茲姑墨數發兵攻疏勒超守槃橐城與忠爲首尾即疏勒國王使恭此時在疏勒國都城正可與超往來接應不慮勢孤而何以超傳既言孤立無援恭傳又云孤城固守明二人必不同在一國可知況一疏勒城也豈有龜茲姑墨攻其一面匈奴車師又攻其一面而兩不相聞者乎且恭果在此城內是以喪敗之餘二三十人受四國迭攻恐亦無此理況鮑昱鄭衆上疏訟恭之功使圍城有四國正當張大其詞而何以一則言匈奴圍之歷旬不下一則言當匈奴之衝對數萬之衆皆僅言匈奴不及他國乎此又可準情酌理明爲必無之事矣至非疏勒國城而亦名爲疏勒者此亦如上郡之有龜茲酒泉之有玉門或居其流人或徙彼降戶皆未可定總之此疏勒泉即爲耿恭所守疏勒城旁之泉雖不敢懸斷而恭所守之疏勒城必非疏勒國都城則已萬無疑義矣前者坐次縱談知足下素留心輿地之學況此泉又近在足下州城之下用敢就便質之負罪遠行不克多攜書藉恐有望礙處尙望足下有以教之

昆侖山釋

昆侖山即天山也其首在西域山海經昆侖墟在西北河水出其東北隅釋氏西域記謂之阿耨達山爾雅釋水云河出昆侖墟史記太史公曰焉本紀言河出昆侖墟其高二千五百餘里之類是也其尾

在今肅州及西寧府漢書地理志金城郡臨羌縣有弱水崑崙山祠郡國志臨羌有崑崙山其地在今西寧塞外崔鴻十六國春秋云張駿時酒泉太守馬岌上言酒泉南山即崑崙之體周穆王見西王母樂而忘歸謂此山也括地志元和郡縣志與地廣記太平寰宇記並云崑崙山在酒泉縣西南八十里是矣杜佑通典云吐蕃自云崑崙山在國中西南河之所出唐書吐蕃傳云劉元鼎使還言自湟水入河處西南行二千三百里有紫山直大羊同國古所謂崑崙廣曰闕摩黎山東距長安五千里在今青海界一統志今黃河發源之處雖有三山而其最西而大爲真源所在者巴顏喀喇也東北去西寧邊外一千四百五十五里延袤約千餘里山不極峻而地勢甚高自查靈鄂靈二海子之西以漸而高登至三百里始抵其下山脈自金沙江發源之犂石山蜿蜒東來結爲此山自此分支向北層岡疊嶂直抵嘉峪關東趨大雪山至西寧邊東北達甘肅涼州以南大小諸山並黃河南岸至西傾山抵河洮階諸州至四川松潘口諸山河源其東而其枝幹盤繞黃河西岸勢相連屬蒙古概名之爲枯爾坤枯爾坤華言崑崙也益可知自賀諾木爾至葉爾羌以及青海之枯爾坤餘延東北千五百里至嘉峪關以迄西寧皆崑崙山也華言或名敦臺之山或名蔥嶺山或名千闐南山或名紫山或名天山或名大雪山或名酒泉南山又有大崑崙小崑崙崑崙邱崑崙墟諸異名譯言則名阿耨達山又云闕摩黎山又名騰七里塔又名麻璉刺山又名枯爾坤其實皆一山也善乎馬岌之言曰酒泉南山即崑崙之體明崑崙山首在西域而其體則餘互漢敦煌郡唐書地理志敦煌酒泉金城等郡界穆天子傳爾雅以及史記漢書所言崑崙皆指今酒泉南山及臨羌大雪山而言不遠迹至千闐葉爾羌以及先零燒當等境也禹貢所言崑崙析支渠搜亦當去雍州不遠崑崙國蓋因附近崑崙山而名今考水經注引涼土異物志蔥嶺之水分流東西東爲河

源禹紀所謂崑崙山者是也是蔥嶺名崑崙之證漢書張騫傳天子按古圖書名河所出爲崑崙山此崑崙山即指今千闐南山是于闐南山名崑崙之證唐書吐蕃傳其南三百里三山中高而四下曰紫山直大羊同國古所謂崑崙者也是紫山名崑崙之證元史河源附錄云吐蕃朵甘思東北有大雪山亦名麻不莫刺其山最高譯言騰七里塔即崑崙也是大雪山名崑崙之證馬岌言酒泉南山爲崑崙之體是酒泉南山爲崑崙之證總之崑崙者人之首崑崙山者山之首亦地之首故以爲各河圖括地象云崑崙山爲地首是也今攷南山自西域至酒泉金城皆南條諸山之首故可總名爲崑崙此山邐迤至雍州境即爲太乙終南諸山山名終南明塞外之南山至此已終也

西海釋

吾家容齋隨筆以爲四海一也無所謂西海其實不然山海經海外大荒經云西海之南流沙之濱有大山名曰崑崙漢書西域傳云于闐之西水皆西流注西海水經注引涼土異物志云蔥嶺之水分流東西西入大海大海即西海與西域傳略同又引康泰扶南傳云恆水之源乃極西北出崑崙山中有五大源枝屬離大江出山西北流東南注大海又引法顯云恆水又東到多摩鞞軒國即海口云海口即西海口也班固西域傳犂鞞條支國臨西海范蔚宗西域傳論云甘英臨西海以望大秦晉書安惠天竺人與大秦國交市海中又云鄰國使到者途經大海海水不可食杜佑通典大秦國即拂菻在西海之西亦云海西國此西海之見于唐以前史傳者若以近今證之葉爾欽即于闐國西域圖見錄華爾欽西行六十餘日至克食米爾克食米爾復西南行四十餘日至溫都斯坦水亦可通云云又云溫都斯坦其地之江河皆通海洋時有閩廣船航到彼停泊是西海即在溫都斯坦之西東西南北之海無不通故西海中亦時有閩廣船

到也所云葉爾欽水可通溫都斯坦又可證西域傳于闐之西水皆西流注西海矣余遣戍伊犁親過溫都斯坦人以筆詢其曲折甚悉土人又云喀什噶爾邊界有阿訇國在西海之濱而一統志于榜葛刺拂林古里柯枝錫蘭山西洋瑣里諸國下皆云在西海中又可知昆侖之西實有西海與東南北三面之海並通非荒遠浩渺無所指實者可比矣蓋西海有泛言者漢書王莽立西海郡在今青海續漢志建安末以張掖居延屬國置西海郡歐陽忞輿地志北庭大都護下有西海縣云唐寶應二年置等是也有土俗各爲西海而實非西海者禹貢山水澤地記谷水出姑臧南山北至武威入海居此水流兩分一水北入休屠澤俗謂之西海水經注又云敦薨之水自西海逕尉犁國去都護治所三百里此西海即鹽澤一名渤澤水經稱爲蒲昌海等是也容齋又疑西海即蒲昌海亦非是有實言西海所在者前後漢書西域傳及山海經水經注以迄上文所稱異物志扶南傳及一統志西域見聞錄等所述是也或又難余曰故書言河源上通天漢則河源當在地之極西今既言實有西海則河源在西海之外乎西海之內乎曰河源介西海之南淮南子墜形訓可證矣云河出昆侖東北厥貢勃海入禹貢所導積石山高誘注勃海大海也河水自昆侖由地中行書曰道河積石入猶出也蓋河水伏流至積石山始出耳故漢書西域傳云于闐之西水皆西流注西海其東水東流注鹽澤河源出焉下語極有斟酌不言水東流注黃河而云注鹽澤河源出焉者明從此以上河皆伏流不礙于闐以西之水注西海也是黃河又伏流于西海之下與濟水之伏流于河水下等耳南宋晁公遡既覽皋蘭以外卽如異域又何況萬里外之葉爾欽溫都斯坦等乎此則校容齋隨筆又未嘗不首欽

昭代輿圖之廣得以目驗口述者證前人所未及也

竹柏樓記

入楓橋半里而近有小谿通胥江谿旁夾岸各數百家岸西有老柏合抱修篁成林者爲袁氏竹柏樓竹柏樓者袁君廷樞之生母韓太孺人撫孤所居也余交袁君遲不及親觀太孺人之行事然每過吳門士大夫必稱袁君學行其稱袁君學行也又必本諸袁君之母余已悚然異之繼于友人處識袁君又嘗一登袁君之堂則所爲五硯之樓萬卷之閣者皆太孺人所留貽也又于梁棟間讀太孺人庭誥家範輒輒誦不忍去袁君又嘗泣告余曰太孺人之教廷樞也凡廷樞一言一行之善太孺人必色喜獲交一端士聞人也亦然凡與廷樞問學相長者過從太孺人必親爲治具或有以緩急告者必傾橐以助之適力有不能則歛歛不怡者累日太孺人歿後廷樞承太孺人之志不改家以此中落爲呼太孺人可爲賢矣余頃以罪謫伊犁不半歲蒙

恩釋歸南抵安西卽允玉門令鄒君承裕之請爲張烈女作傳今又得紀吾賢母行事往返三萬里中甫得傳一烈女紀一賢母然後知貞固之操瑰奇之行在世間亦不能多得也凡作竹柏樓詩者共若干人而舊史氏洪亮吉爲之記

錢大令維喬詩序

余幼耽吟詠未成童卽識里中詩人三曰陳襄賓曰湯遵路曰錢季木時三人者詩名已噪余甫學吟未敢遽定其優劣也三十後交道漸廣學識亦粗進因悉取三人者之詩而合觀之襄賓能頌習古人矣顧自爲詩反不能學古人遵路能學古人矣而未能盡化古人之蹊徑也獨季木才最高五言法魏晉六朝歌行則自初唐以迄北宋諸家無不涉歷近體則尤近大曆十子雖心摩古人而于古人之外別有一種幽奇靈秀之氣耐人尋味余尤心折之年益長交益深季木所爲詩亦益富及四十後季木已以名聲廉出宰浙中數縣遷有日矣忽謝病歸築室邛溪之北名曰半園之半乃過從未及數月

余卽入都嗣後官京師者十年季木之音問時至詩顧不多觀也歲戊午余以第喪乞假歸在里中八閱月與季木過從尤密亦時觀季木之詩季木亦時時言欲綜理前後所作乞余訂定之而余又以奔

國卽入都矣不半歲以語言愚惑部議殊死聖天子寬其要領之誅戍之絕域卽日押出

國門時余在請室中綴繼徧身役車又數促上道匆猝未暇念及妻子也獨割識案紙尾疾作書寄季木與孫兵備季仇與之訣別聞季木得余書痛哭失聲時時走余家問消息及余抵戍所甫一日卽得季木書于馬難申之以婚姻所以慰戒之者無不至在戍所三閱月凡三得季木書而余已蒙

恩旋里矣季木于友朋死生離合之際不忍相負如此然後知季木詩之工季木性情之摯爲之也爲乎人惟性情不摯故遇事輒持兩端甚或幸人之急而排擠之訕笑之以自明涉世之工否則自詡爲深識遠見以爲固早慮其有此此其人亦何嘗不爲詩文然要皆揣摩世故之談與影響游移之語求其能領習古人者已十不得一矣況能學古人而得其似乎學古人而得其似又百不得一矣況能于古人之外別具心手乎此季木詩之所以可貴而于之序季木詩綜覽平生不禁其悲喜之交集也季木近頗學釋道兩家他日所爲詩或稍雜道流禪悅之語然此非季木詩之至也故予序季木詩亦以己未以前爲斷云

復藏文學鐫堂問通俗文書

昨領到通俗文輯本披閱之下知足下好古之殷網羅載籍之博與亡友任君大椿所輯字林均爲小學家不可少之書矣亮吉幼亦嘗從事于此故算集致語內欲足下于所引原書下分別開載以存古人之實足下或不以爲然而又垂詢及之用敢粗次所知者以復焉

此書自劉昭續漢書注後徵引者不下十餘家然惟李善文選注及太平御覽所采最夥攷文選注引通俗文不著服虔者如上林賦注水鳥食謂之噍長楊賦注骨中脂曰髓登樓賦注暗色曰黯江賦注髮亂曰髻髻等是也有引通俗文而明著服虔者藉白馬賦注天子出虎賁伺非常謂之遮翅長笛賦注營居曰鄔洛神賦注耳珠曰瑤琴賦注樂不勝謂之嘒嘒等是也御覽引通俗文不著服虔者晉不覆齒謂之齟齬乳病曰疳十一噴導曰響六十八障牀曰瞻六十九等是也引通俗而明著服虔者劉勰傷盜謂之搶三百三毛飾曰髡三百四首劍屬其頭類七故曰匕首短而使用三百四矛長八尺謂之稍三百五丈杖曰格三百五所以制馬曰韁三百五凡勒飾曰珂第樓尾曰輶三百五等是也至若他書所引有止言服虔而文法絕似通俗文者史記禮書裴駰集解引服虔云簪謂之第等是也有變文言通俗篇者文選琴賦注引服虔通俗篇是也又有止言服虔俗說者顏氏家訓書證篇殷仲堪常用字訓亦引服虔俗說之類是也至杜預左傳注多用服虔舊說今通俗文與杜注可相發明者極多又如亭水曰汪腋下謂之脅頭創曰瘍遮取謂之抄掠自蔽曰庇財帛曰賄覆蓋曰葦等疑皆服虔氏注左傳舊說又互見于此編也蓋左傳文三年麇魅罔兩周禮家宗人正義引服虔注云麇麇木石之怪而一切經音義引通俗文木石怪謂之罔兩益可爲服虔著通俗文之證至襄十四年射兩駒詩小戎正義引服虔注云駒車輶而御覽七百七引通俗文云軸限者謂之枸枸駒古字同又可知義訓無不合矣至前人疑此書出李虔者不過因晉中經簿所無又引初學記器物部舟第十一引李虔通俗音曰船一語以證梁阮孝緒之說不知器物部牀第五先引服虔通俗文云牀三尺五曰榻板獨坐曰枰八尺曰牀近在一卷之中且牀第五引服虔之說緊次說文而舟第十一引李虔之說則次于廣雅之後明通俗文係服虔所作

而李虔續之名既相同阮孝緒等遂混二書爲一如許慎淮南王書注半淆入高誘注中亦賴有御覽係北宋初年所輯尙分標二人之名後人則亦混爲一矣唐書藝文志固明標李虔續通俗文言續則非始自李虔可知君家先人經義雜記又以隋書經籍志次此書于沈約四聲等書後而證其爲李虔不知隋志亦唐人所修與徐堅釋元應相距不遠今徐堅所引則次于說文一切經音義所引則皆在三蒼釋名之上則唐人亦皆以此書爲服虔所造也至若反音不妨爲後人所補入或專係李虔續書中語與通俗文之爲服虔注無礙也又輯本中亦尙有脫漏處如御覽人事部二十二引通俗文容麗曰媚形美曰嬌容美曰媚南楚以好爲娃肥骨柔弱曰嫵娜頰輔妍美曰嫵媚容茂曰嫵不媚曰嬌可惡曰嫵大醜曰嫵醜稱曰嫵等語足下引其半而遺其半未審何故得暇尙示知之

三山僧詩合刻序

三山僧者乳山方丈古巖攝山方丈慧超焦山方丈巨超三山者在江寧鎮江之閒相去不越一二百里山既近而三僧者以詩相切磋無閒晨夕余不識古巖而識巨超又因巨超識慧超二超者又時時爲余道古巖遺事既而讀三僧詩其清遠絕俗若出一轍又加以性靈焚香掃地碗飯杯茗鐘聲磬聲佛號佈施之雜香經懺之繁瑣入則一蒲團一龜出則一瓶鉢經府歷縣踏山蹠水千險百怪億態萬狀一一見之于詩而未已也值俗家父母兄弟之疾痛所居所遊歷之州縣水旱疾疫皆于詩見之非尋常縉素者流操守戒律以口頭禪爲五七律者比或以謂三僧者既逃乎方之外矣而又拳拳于一家拳拳于一世若此于彼道爲過余獨謂不然三僧者惟遊于方之外而尙能拳拳于一世以視士大夫受僑界之重而遺棄一切不肯任事反侈說因果縱談天釋以驚世而惑衆彼其心或以爲置身事外則人莫能窺我之隙矣又豈知即談空說法

而不能任事之實已百喙莫辨乎則何如此三僧者雖以空虛爲主寂滅爲宗而尙不忘天性之親與食毛踐土之德有所觸而即動至于如此也余性不佞佛而未嘗不與方外交方外之交又以二超爲最因二超而復有以知古巖然後知方外之詩亦未嘗不以性情爲重也陽湖洪亮吉序

重建新塘鄉文成橋碑記

自城而鄉橋之石者以千計大率初始于

本朝者十之三初始于明者十之七中其在弘治以前者又居大半焉蓋其時世漸坦夷人皆務實工作之事董厥成供厥役者一切無苟且之心濬之欲其深培之欲其廣鎔之欲其固築之欲其堅縱歷三四百年偏旁偶有傾塌而視其內則擊之不能入也斧之不能裂也即一橋之成而人事之慎密物力之充裕均可見焉明中葉以後則不然斂錢非不多工作非不久而視其石則薄以裂視其磚則濬以埤視其灰與土則淋而不周掩而不實故稽其所歷之歲月書不及弘治以前之半云新塘鄉之有橋俗呼曰雪堰即方志所爲文成橋也其上爲南北之孔道其下爲吳越之要津又爲太湖之隘口旱潦宣洩之所經嘉慶五年六月甚雨水漲橋忽崩圯橋洞之碑出焉云建千成化二十年考之方志則又曰成化十三年要不出成化中近是逾年本鎮募錢得五百餘千復興築之拆視其下基址深固層復一層惟橋以松木則已朽壞于是某某司其事者益不敢艸率卒工而排基則易以徑尺老杉長約七尺餘老杉以上均用大石博砌復鋪以石粉自水盤石而上約深十餘層計深大有某某等皆廢其本業日夕監視稍不如意輒改作之以視成化年之所造蓋有加焉夫橋之成必書其歲月及司事者之姓名于石此陳例也若歷久而不壞則里之人必追頌之曰是某某之所督司也某某之所營造也費不浮而工歸于實是以能歷久若此若夫成而遽毀或不

及百年不及數十年而遽毀則里之人亦必竊議之曰是某某之所督司也某某之所營造也斂錢雖多中飽者若干浮費者若干某某又慢于其事以致如此則豈不爲一方之大戒哉橋成乞亮吉書日月于石因樂爲記之并垂以爲後來式云時嘉慶六年九月望日董太恭人晚翠軒遺稿序

晚翠軒遺稿者吾友董君心牧母莊太恭人所製也亮吉與心牧同歲生心牧日月差長亮吉六歲孤心牧九歲孤又值兩家中落貧苦之況亦略同憶亮吉服喪甫闋心牧尚未居憂舅姑董安人莊太恭人從姑也暇日偶攜諸姊及亮吉訪太恭人于玉梅橋里第時太恭人一子一女女甫及笄里第向北太恭人居屋南向屋中設幔一臥榻二南壁鑿櫺層疊貯書一琴在北几環益四五列西牖下董安人知太恭人之善琴也拂絃以請太恭人轉以命女鼓竟一曲乃止復與董安人語兩家事故甚悉亮吉時與心牧兒戲堂下聞聆太恭人語雖年尚少無甚識解已肅然敬之始戊戌日復與心牧訂交益詳審太恭人之所以撫孤所以教子所以貧而自立幾幾至于于之有成也與吾母太宜人一無以異以是兩人交益親學亦益苦及亮吉與心牧先後成進士官京師而兩家之母已不及見矣閑中與心牧過從談及先世事往往對泣不已歲戊午亮吉時蒙恩侍學三天以第喪乞假歸適心牧亦以戶部郎出守廣西潯州兩人者又同時出都同時抵里里中諸父老與知舊識客兩人者亦無不偕心牧則時時言欲爲太恭人刊遺稿而以序屬亮吉亮吉敬諾之然心牧行甚急不暇報命也後一年亮吉以奔

國卽入都半歲復乞假歸瀕行奏記三府以語言愚癡罪至不測今上赦其死罪遣戍伊犁行至涿州始聞心牧廣西之計于役軍中東向以哭不暇爲位也爲呼亮吉與心牧交三十年心牧則可以不死而遽死亮吉則可以死而卒不至于死以至復荷

聖天子不次之恩放歸田里距與心牧別僅二年距心牧之死僅一年耳方其荷戈萬里冒大雪出關行無人之境者至六十日墮傳車不死陷雪窟不死又豈知生還者有日復能訪太恭人舊日之居第并亮吉童年與心牧嬉遊之所一再展故人殯又敬序太恭人之詩乎蓋吾兩家三十年來死生離合之故無不畢備序太恭人詩一一帳觸及之涕不知何從又因太恭人而轉傷吾母太宜人之先亡與太恭人皆不逮子之祿養繼又念亮吉流徙還轉頓千萬死之狀幸太宜人不及見之見之而或悲其愚悲其愚而又或慮其死則太宜人必憂傷成疾是又益重亮吉之罪也太恭人遺稿一卷詩凡若干首上者無愧漢魏閒人次者亦不作尋常閨閣語雖一編寥寥其傳于後已無疑義若夫志撫孤之大節前仁和盧學士文弼撰常州府志已與吾母太宜人並編入賢母傳無俟亮吉復述時嘉慶五年歲次庚申歸自伊犁之次月

與宿松文學書

遠承足下渡江過訪慰甚幸甚坐次足下述及宿松本漢之松滋并言漢晉時有五松滋分屬廬江安豐南郡南河東及僞立之松滋郡其言甚辯然實不如足下所云也今攷松滋之名始于漢昭帝始元五年封六安共王干霸爲侯國漢書地理志廬江郡有松滋注云侯國是也今廢縣在宿松縣北後漢無松滋縣至晉初復立又移屬安豐郡縣治亦移至北百餘里圖經故城在今霍丘縣東十五里沈約宋書州郡志魏晉太康地志松滋縣屬安豐是也安豐郡本分廬江郡立是安豐之松滋即廬江之松滋無疑矣至晉成帝又于尋陽僞置松滋郡安帝又省松滋郡爲松滋縣皆違轍揚州晉書地理志所載是也圖經廢縣在今九江府德化縣東此松滋僑縣之一矣若荊州南郡之有松滋縣晉書地理志云咸康三年以松滋流戶在荊土者立松滋縣沈志亦云疑是有流民寓荊土故立今湖北荊州府松

滋縣尚承晉僑縣舊名此松滋僑縣之二矣若南河東郡之松滋則沈志又云晉成帝咸康三年征西將軍庾亮以司州僑戶立南河東郡而圖經則云咸康四年于南郡所屬松滋僑縣立南河東郡是南河東郡之松滋即南郡之松滋非有二也然古今地志每好立異說以亂真如松滋之改名高塘高塘之改名宿松在隋開皇十八年而樂史太平寰宇記乃云晉武平吳以荊州有松滋縣遂改爲宿松夫晉武平吳即漢松滋舊縣立尚未久何容即有荊州之僑縣則豈非贅說乎又古今地名復云廬江郡松滋即古鳩茲地攷左傳襄公三年子重伐吳克鳩茲杜預注云鳩茲吳邑在丹陽蕪湖縣東今皋夷也圖經今訛作勾茲港在縣東四十里是鳩茲在江以南何容越江七八百里移至今霍丘縣境乎此又不可不辨者矣總之瓜分豆剖以僑戶占實土之名以後起變厥初之號遂至一縣之名也而領之者四州州統之者五郡郡屬之者三縣而地志之好爲異說者又不一何怪足下之致疑乎足下能以漢晉宋地志爲據而稽其道里驗其沿革不爲異說所惑則善矣

呂廣文星垣文鈔序

吾里中多瑰奇傑出之士其年相若而才足相敵者曰孫兵備星衍楊戶部芳燦暨君而三三人者皆肆力于詩古文辭而各有所獨到孫君能爲說經辨駁之文以匡雅圭劉子政爲宗楊君能爲梁陳初唐之文尤以徐孝穆王子安爲宗君之文則不名一體其上者則敬通問交士衡辨亡也其次則皇甫持正之寺碑孫可之之書壁也至義關懲勸旨寓抑揚則灑灑千萬言不止此又君之自命而人亦以此推君者矣三人者負其才各不相下馳騁名場也及三十載然或立勳邊徼或著績河防皆卓然有所樹立君獨窮老不遇僅以名諸生貢入貢監出而秉鐸數縣所遭益無聊賴則自命益不凡自命益不凡則所爲詩文益放而不可捉摸今之白雲堂文稿至數十百

篇大半皆秉鐸時之所作也余二十後與三人交于孫君尤密次則君又次則楊君猶憶丁酉春余居憂授徒里中楊君者買舟百里相唱時君與孫君皆落拓居里因約至舍作竟夕談余時實塵在白馬三司徒巷側貧甚無几榻三人者相與就余苦次鱗比而寢夜半月出談亦益縱顧饑甚無所得食君獨敲石火搜旁室中得敗盞及麥屑升許就三隅竈作餐競以手掬食至飽天破曙生徒以次進三人者始散去是時年少氣盛讀書多不甚知世事各負其兀傲之志視古今無不可及之人天下無不可爲之事以爲他日當各有所建豈不負知己也乃忽忽數十年各更事故各歷艱險齒髮日益頽意氣日益減而議論亦日益持平雖後此所成就尚未可知而三人者明歲皆已五十余則又過之爲可歎也余前歲遣戍出關楊君適官滿侯代錢余于皋蘭河橋作歲象

恩旋里時孫君居憂寓居江寧先訪余里第獨君以職守不獲相見而書問時時來均可爲死生患難之友矣然則今之序君文者豈僅爲君文而設哉他日序孫君楊君之文亦當如是而已

諸氏族譜序

有西北之著姓有東南之著姓西北之著姓如弘農之楊聞喜之裴河東柳薛涿郡崔盧之類是也東南之著姓則延陵之吳義興之周琅邪之王南昌之熊以及吳郡顧陸朱張浙西則范全姚沈之類是也又有姓雖稀而不可不謂之著姓者西北則太原之祁廣平之閻東南則丹陽之荆昆山之諸丁戶不甚繁然自春秋迄今二千年中常聚族而居或占一鄉或占一鎮即小有遷徙亦不出數百里之外聞數代必有聞人是以譜系修明昭穆畢舉洵可謂土著之各族矣考諸姓出自越大夫諸稽郢其見于春秋左傳者有諸軼見劉向說苑者有諸發見應劭風俗通者有洛陽令諸於今按其譜系雖自越而吳自蕭山而昆山自昆山而無錫自無錫而陽湖要皆不出四

五百里自唐宋以前則閒有可攷元明以來則世次秩然瞭如指掌非子孫之賢而有學世世克承其先志而能如此乎且諸氏歷世以來官閥雖不甚顯而亦無極不肖子弟獲罪家國爲世所指名者于史冊如沈氏之充柳氏之璩熊氏之疊則崔氏之允昭緯其人者謂非名宗之大幸抑亦家法修舉而能然歟是則講求譜系所以紹祖宗條舉家規即所以以下貽孫子亦名宗賢士大夫之責矣嘉慶六年歲在辛酉某某等將重修族譜以余之粗辨姓氏也乞爲識其始末余故樂爲序之

釋璽一篇示及門呂璽

說文字皆從本訓獨璽字說文云王者印也則本秦漢之制言之非璽字本訓何則璽字從土古人制璽蓋皆以土爲之呂氏春秋適威篇云若璽之于塗也抑之以方則方抑之以圓則圓淮南齊俗燒土爲璽此云抑之以方抑之以圓者未入火以前璽之坯也秦漢以前軍卑共用之周禮地官司市凡通貨賄以璽節出入之鄭康成注云璽節印章若今之斗檢封矣掌節貨賄用璽節鄭注亦云今之印章也月令孟冬之月固封璽漢書注呂氏春秋云璽讀爲移徙之徒封璽印封也誘注淮南子亦同左傳襄公二十九年公在楚季武子使公冶問璽書追而與之璽在昭公以前則世本之說非矣杜預注璽印也戰國策欲璽者段干子也史記楚世家懷王璽相璽於張儀是上下通名璽之證籀文璽字從玉此籀文出當在後秦以來璽無不以玉爲之者故字又從玉耳孔穎達正義引衛宏云秦以前民皆以金玉爲印惟其所好宏此語亦但以意言之如秦以前即以玉爲璽而因製從玉之璽則宏言金可爲璽何又不制從金之璽乎玉有璽字云璽正也收璽切義與此別至說文王者印也下又云所以主土蓋因字本从土上王者印也四字恐與土義不相涉故又足此四字然究非此字本訓玉篇以下又皆承許氏之說玉篇玉部下璽字又云天子諸侯

印也義亦不該若在秦以前則稱璽者不僅天子諸侯若在秦以後則諸侯亦不得稱璽蔡邕獨斷所言皇帝六璽續漢書與服志璽皆玉璽虎紐文云皇帝行璽皇帝之璽皇帝信璽天子行璽天子之璽天子信璽百官志符節令下有尚符璽郎中四人本注云舊二人在中主璽是也符璽郎中舊傳光召尚符璽郎中四人本注云舊二人在中主璽是也符璽郎中舊傳光召尚符璽郎中四人本注云舊二人在中主璽是也符璽郎中舊傳光召尚符璽郎中四人本注云舊二人在中主璽是也符璽郎中舊傳光召尚符璽郎中四人本注云舊二人在中主璽是也符璽郎中舊傳光召尚符璽郎中四人本注云舊二人在中主璽是也

釋珠乙篇示及門李珠

說文玉部珠云蚌之陰精亦非珠字本訓攷珠字從玉古人之珠皆以玉爲之周禮天官玉府掌共王之服玉佩玉珠玉若合諸侯則共珠盤玉敦是也鄭注及孔穎達疏以珠玉爲珠盤漢書與服志孝明皇帝永平二年初詔有司采周官禮記尚書皋陶篇乘輿服從歐陽氏說公卿以下從大小夏侯說冕皆廣七尺長尺二寸前圓後方朱綠裏元上前垂四寸後垂三寸係白玉珠爲十二旒按此即周禮并三公諸侯七旒青玉爲珠卿大夫五旒黑玉爲珠所謂白玉珠青玉珠黑玉珠皆琢小玉之白青黑者爲之歐陽夏侯皆承周秦以來先儒舊說明三代之制冕旒所垂之珠皆琢玉爲之非蚌珠矣按蚌珠黑等珠亦有出于天然不須琢者山海經歷山楚水多白珠揚雄子虛賦云赤玉玫瑰琳瑯昆吾注引倉頡篇云玫瑰火齊珠也張揖云琳瑯也左思蜀都賦云江珠瑕英又云青珠黃環注引博物志云江珠琥珀別名青珠出蜀郡平澤玉篇蜀郡平澤縣出青珠此皆玉珠之天然不須琢者且即以說文證之瑰字下云玫瑰一曰珠圓好又云璣珠之不圓者又云璣玕似珠者亦可知珠皆玉爲之矣若蚌珠亦名珠者以其形之似名之然古人亦不單喚爲珠必加字于上以區別之禹貢淮夷璣珠璣魚是矣若古人所用之珠果皆係蚌珠則

字當从虫不必从玉也又考說文玼字下云玼珠也宋宏云淮水中出玼珠字又作璣云夏書玼从虫賓玉篇玼又作璚此則專指蚌珠而言是知蚌珠之珠本別有字玼是也璣是也璚亦是也不必更以玉珠之珠移屬于蚌也況物之有珠者又不獨蚌山海經文魼生珠玉又云激汝之水其中多蜃玼郭璞注玼亦蚌屬是蚌有珠魼蜃亦有珠矣他若蠃龍魚龍蛟蛇龍龜亦皆有珠埤雅采舊說云龍珠在頷蛇珠在口魚珠在目鮫珠在皮鼈珠在足鼈珠在腹之類是也明百物之珠皆借玉珠之字爲義與服志又云建華冠貫大銅珠九枚是五金皆可以製珠然但能同其名不可卽奪其義人之呼之者必當曰銅珠或曰龍珠魚珠不得僅目之爲珠也然則珠字自有本訓何得獨屬之于蚌乎孫強等著唐韻稍知其義于珠字但注云珠玉不專屬之蚌最爲得解夫余爲許氏之學者也非敢規許氏但欲以輔其不及耳餘尙有十數字不从本訓者辯已見曉讀書齋雜錄不贅

更生齋文甲集卷第一

春秋十論

壬戌歲在旌德洋山書院課徒因作此以示及門

春秋時以大邑爲縣始於楚論

春秋時楚始以大邑爲縣按秦本紀孝公十二年并諸小鄉聚集爲

大縣縣一令凡四十一縣南齊書漢書百官表縣令長皆秦官萬

戶以上爲令秩千石至六百石減萬戶爲長秩五百石至三百石皆

有丞尉按南齊書然其制實自楚創始之左傳宣十一年楚子入

陳殺夏徵舒因縣陳十二年鄭伯對楚莊王曰使改事君夷于九縣

杜預注楚滅九國以爲縣願得比之正義言楚滅諸國見于經傳者

哀十七年稱文王縣申息莊六年稱楚滅鄧十八年克權僖五年滅

弦十二年滅黃二十六年滅麇文四年滅江五年滅六又滅麇十六

年滅庸凡十一國蘇氏沈氏以權爲小國庸先屬楚除二國外爲九

也襄公二十六年伯州犂言穿封戌方城外之縣尹此見于左傳者

也其見于史記楚世家者則子革對靈王曰且入大縣而乞師于諸

侯又惠王之十年是歲也滅陳而縣之是也此外則晉自文襄以後

大邑亦各縣左傳僖三十三年晉襄公以再命命先茅之縣賞胥臣

宣十五年晉人賞士伯以瓜衍之縣襄公二十六年楚聲子欲復椒

舉謂令尹子木曰晉人將與之縣以比叔向昭公五年遺啓疆謂楚

子曰韓賦七邑皆成縣也又云因其十家九縣其餘四十縣云云二

十八年晉殺祁盈及楊食我分祁氏之田以爲七縣分羊舌氏之田

以爲三縣是也蓋春秋時已有改封建爲郡縣之勢創始於楚而秦

與晉繼之至戰國而大邑無不爲縣矣又考楚文王縣申在魯莊公

六年史記秦本紀言武公十年伐邽冀戎初縣之十一年初縣杜鄭

晉語公子夷吾對秦使公子繫曰君實有郡縣皆當在楚文王縣申

之後廣韻又言楚莊王縣陳縣所自起亦非當云自楚文生縣申息始後世置小州其制亦始於楚左傳宣公十一年莊王復封陳鄉取一人焉歸謂之夏州史記蘇秦傳楚東有夏州海陽集解引徐廣云楚考烈元年秦取夏州今按楚世家又云納州于秦徐廣又註又引車胤撰桓溫集云夏口城上數里有州名夏州張守節云州在大江中

春秋不諱娶同姓論

春秋時娶同姓者不一而足穆天子傳有威姬是天子以同姓之女

備後宮也列國則晉獻公有大狐姬小狐姬驪姬其嫡生卓子亦姬

姓故莊公二十八年傳惟二姬之子在絳平公則內有四姬傳襄二

十六年衛人歸衛姬于晉等是也國語富辰曰聃由鄭姬韋昭注聃

姬姓文王之子聃季之國鄭女爲聃夫人同姓相娶大夫則齊崔杼

娶棠姜東郭偃所云君出自丁臣出自桓是也慶舍以女妻盧蒲癸

慶舍之士以爲子不避宗是也哀公十一年太叔懿子娶晉悼公子

懿女亦同姓晉則羊舌氏爲晉公族而亦娶同姓論衡叔向之母姬

姓是矣廣韻鄭公子有食采于徐吾之鄉後以爲氏是子南子哲又

爭娶同姓之女也獨昭公以吳孟子貽議者以魯爲兼禮之國故耳

又世皆譏漢惠帝娶魯元公主女爲婦以爲妻外甥女不知春秋時

即有之左傳僖公二十四年晉侯逆夫人嬴氏以歸史記晉世家文

公夫人秦女也服虔云穆公女文嬴也又傳稱秦伯納女五人懷嬴

與焉晉語稱不敢以禮致之懼之故也韋昭注懼愛此女之故是懷

嬴亦穆公之女子晉文公皆外甥女也

春秋時晉大夫皆以采邑爲氏論

晉大夫皆以采邑爲氏除韓趙魏本係建國不必更論後趙氏別子

趙同食采于原故又稱原同屏括食采于屏故稱屏括又稱屏季邯

鄲氏食采于邯鄲故稱邯鄲氏元和姓纂邯鄲氏趙穿之後魏襲之

孫魏鑄食采于呂復食采于廚故稱呂鑄亦稱廚武于國語鑄之子亦稱呂宣子又魏顆于魏頤食采于令狐故國語又稱爲令狐文于地理志河東郡倚氏樂史云春秋時令狐也韓獻子元孫康食邑于蘭又稱蘭氏地理志西河郡蘭縣廣蘭姓亦出西河韓獻子元孫康食邑于此因氏焉外若樂氏食采于樂故樂叔以下皆稱樂氏左傳哀公四年國夏伐晉取邢任樂鄰杜預注樂在趙國平棘縣西北按卽今趙州西北故樂城與正定府樂城縣接界地理志常山郡關縣後漢改爲樂城是矣郤氏食采于郤故父曰郤豹子曰郤芮一切經音義引聲類云郤鄉在河內是也後又食采于冀故亦稱冀芮水經注引京相璠曰今河東皮氏縣有冀亭古之冀國所都左傳僖公三十三年命卻缺爲卿復與之冀是矣其後卻缺食采于苦成故又曰苦成叔潛夫論苦成城名也在鹽池東北豹之孫楊又別食采于步故稱步楊世本豹生義義生楊楊生鵠居廣韻晉有步楊食采于步因氏焉楊子鵠居食采于蒲城故稱蒲城鵠居周語韋昭注鵠居子至食采于溫故亦曰溫季按廣韻唐叔虞之後受封于河內溫因以命氏是晉又有公族溫氏也胥臣先食采于胥後又食采于臼故稱胥臣亦稱臼季左傳僖公二十四年取臼衰水經注引京相璠曰桑泉臼衰並在解東博物志又云臼季邑在解邑西北先軫食采于原故曰原軫杜預釋例云河內沁水縣西北有原鄉是矣至先且居則又稱霍伯當亦以采地名郡國志河東郡永安縣有霍太山按山側有霍城水經注汾水又南逕霍城東是也韋昭又云先且居先軫之子蒲城伯也後受霍爲霍伯是未受霍以前又嘗食采于蒲城故云蒲城伯蒲城卽重耳所居在漢河東郡蒲子縣其後先軫又食邑于彘故曰彘季地理志河東郡彘縣是也悼公時士魴亦食采于彘故亦曰彘恭子狐突食采于狐故稱狐氏其子狐毛狐偃亦然左傳僖公十六年狄侵晉取狐廚杜注臨汾縣西北有狐谷亭又云狐

廚受錫昆都晉二邑偃之子又食采于賈故又稱賈季韋昭晉語注賈佗狐偃之子射姑太師賈季也食邑于賈字季佗劉昭引博物志曰臨汾有賈鄉賈伯邑又圖經蒲城縣西南亦有賈城卽古賈國古今地名亦同荀息食采于荀潛夫論荀亦作郇杜預注解縣西北有郇城水經注汾水下古水又西逕荀城古荀國也汲郡古文晉武公滅荀以賜大夫原氏按竹書紀年晉曲沃滅荀以其地賜大夫原氏黯是爲荀叔是荀叔本姓原氏以食采于荀始稱荀叔也又紀年于桓王二年云莊伯以曲沃叛伐翼公子萬救翼荀叔軫追之此荀叔軫或卽惠之先始受采地者也後荀首別食采于知故自錫以下又稱知氏劉昭引博物志河東解縣有知邑是也呂甥先食采于呂劉昭引博物志云河東永安有呂鄉呂甥邑後又食采于陰故稱陰甥甥左傳哀公四年國夏伐晉取陰人後又食采于瑕故亦稱瑕甥郡國志河東郡解有瑕城按後晉書亦食采于瑕故曰瑕嘉文公十三年晉侯使詹嘉處瑕以守桃林之塞是也士會之先隰叔食采于隰郡國志河內懷縣有隰城至士會先食采于隰後又食采于范故稱隰會又稱范武子至文子宣子獻子等皆然韋昭晉語注食邑于范爲范氏又云隰范晉二邑潛夫論食采隨故氏隰左傳隱公五年翼侯奔隰杜預注隰晉地圖經隰城在介休縣東春秋時爲士會食邑地理志東郡范縣圖經春秋時晉大夫士會邑隰射父食采于隰梁由隰食采于樂梁號本皆晉國隰處父食采于隰箕鄭父食采于箕郡國志修武有隰樊樊茅田杜預注太原陽邑縣南有箕城是也圖經又云陽邑縣晉大夫陽處父邑邢侯食采于邢雍子食采于雍地理志河內郡平皋縣曰其地屬晉號曰邢丘郡國志山陽縣有雍城董氏食采于董左傳文公六年改董于董杜注臨汾縣有董亭又有董澤在聞喜縣東北四十里古秦龍氏董父所居故名解揚食采于解郡國志解縣有解城張老食采于張潛夫論河東解邑有張城

有西張城史記又有東張城今在虞鄉縣西北輔果食采于輔鐸邊
寇食采于鐸左傳宣公十五年秦伐晉次于輔氏杜注輔氏晉地十
六年晉滅赤狄及留吁鐸辰苗黃食采于苗杜注食邑于苗地梁
餘子食采于梁榆水經注梁榆水出梁榆城接在漢上黨郡涅氏縣
圖經春秋時晉梁餘子養邑王官無地食采于王官左傳文公三年
秦師濟河取王官及郊夏陽說食采于夏陽按夏陽即號舊邑高梁
伯食采于高梁故曰高梁伯杜注高梁在平陽楊縣西南莢成僖子
食采于莢成廣韻姓出平陽世本有晉大夫莢成僖子閻氏食采于
閻元和姓纂唐叔虞之後公族食采于閻邑因氏焉今考昭公九年
周甘人與閻嘉爭閻田是閻嘉亦以食邑爲氏故曰閻嘉也柏氏食
采于柏晉語韋昭注柏晉之舊姓地理志趙國柏人注本晉邑叔向
稱狐續慶伯古伯柏同當即此也陘氏食采于陘廣韻云陘晉邑也
大夫氏焉今爲井陘縣以至祁氏食采于祁按晉羊亦食采于祁地
蓋是時祁氏已滅與鄭銅鞮楊氏食采于楊縣等語又云楊
之屬司馬彌牟樂霄等同楊氏食采于楊縣有梁城去縣五十二里
叔向邑也又按水經注河東郡楊晉大夫條安郎氏食采于鄆孟丙
之邑蓋條安食采于楊亦在羊舌氏滅後也郎氏食采于鄆孟丙
食采于孟銅鞮伯華食采于銅鞮太康地理志銅鞮晉大夫羊舌赤
邑又未食銅鞮以前又嘗食邑于羊舌左傳正義引世族譜羊舌其
所食邑也邯鄲午食采于邯鄲蒲城午食采于蒲城則又皆漢河東
河內上黨太原趙國所屬之大縣人所共知者矣更有異者地理志
上黨郡余吾通典作徐吾按左傳昭公二十八年晉大夫有知徐吾
又河東郡襄陵有饒氏鄉亭水經注襄陵縣故城晉大夫卻饒之邑
也故其地有饒氏鄉亭是又以采邑命名矣亦他國所未有也

春秋惟秦不用同姓而喜用別國人論

春秋時刻國皆用同姓惟秦不然見于經傳者亦不過數人公于繁
小子慈公子鍼公子士雅等是也至好用異國人則亦自穆公啓之
秦本紀所云求百里于楚迎蹇叔于宋取由余于戎求不豹公孫枝

于晉外又有內史廖隨會等數人若孟明視西乞術白乙丙則又百
里奚及蹇叔之子也降至戰國而孝公用商鞅惠文君用公孫衍張
儀司馬錯樂池魏章武王用甘茂陳軫齊明周最昭襄王用田文樓
緩壽燭向壽白起任鄭呂禮蒙武尉斯離客卿胡傷客卿竈王鮒司
馬梗張唐范雎蔡澤將軍摎莊襄王用呂不韋蒙驁及始皇用嫪公
王齋茅焦尉繚桓韓楊端和王翦李斯羌苑昌平君秦之公子蒙
文君王賁李信王綰馮劫王離趙亥陳林馮毋擇王成趙嬰楊樛蒙
恬辛勝類皆異國人也骨肉中惟樛里疾最用事然疾中間又嘗相
韓明用之亦無商鞅范雎之專矣且公子虔同姓之親又太子之傅
也鞅一言而即剄涇陽君高陵君王之同母弟也雖一言而即出之
關外公子十二公主十皆二世之親昆弟也趙高一言而同日伏尸
于市明秦于骨肉之恩本薄故人得而間之惟遊士則不然能西
行入秦無不各得所欲有不幸者僅韓非鮑丘等一二人遭讒譖謗
以死耳其他則皆立談取卿相者也此非穆公之留貽家法然乎然
秦之霸以此秦之并天下以此秦之士崩瓦解亦以此迨二世之亡
項羽殺子嬰及秦諸公子宗族疑其于姓已無復有矣此則雖貴爲
天子而易姓之後尙遠不如齊之諸田楚之屈昭景等猶能布滿天
下謂非立法不善之故哉吾故曰春秋時惟秦不用同姓而喜用異
國人其法自穆公始爲乎穆公家法之不善又豈僅殺三良而已哉

春秋晉比楚少恩論

春秋時晉國待大夫最少恩左傳昭公三年叔向對晏子所云欒卻
胥原狐續慶伯降在卓犖是也至二十八年而祁氏羊舌氏族亦滅
夫狐胥爲從亡之臣欒卻原皆有勞于國外如伯宗祁奚叔向之賢
又皆傳所云猶將十世宥之者也況所坐之罪又均非叛逆狐續則
坐專殺先穀則剛愎三卻則驕侈胥童則從君于魯欒祁則又以家
事至于滅宗最爲無罪若伯宗之被讒羊舌之從坐又不待論矣楚

則不然伯勞之惡至于攻王同懷之悖至于欲弑君然莊王則曰子文無後何以勸善命其孫箴尹克黃復其所昭王則復國之後賞大功九人門懷亦預焉子西請舍懷王曰大德滅小怨道也夫一家之中兩犯叛逆之罪門氏而不以其身與子孫楚報功之典可云厚矣卒至戰國之末而屈昭景三族亦究與楚相始終謂非立法之厚遂獲享其報乎若昭公二十七年傳言盡滅卻氏之族則令尹子常爲之非王之意也又攷春秋于叛臣箴弑之臣其子孫之食祿居位亦並如故并不忍絕其後者夫鄭之公叔段可云叛臣矣然左傳莊公十六年公父定叔出奔衛段之孫三年而復之曰不可使共叔無後于鄭又使以良月入何其用法之寬乎至夏徵舒親弑其君可云罪大惡極矣然左傳昭公二十三年其孫陳夏徵復見于經世本徵舒生惠子晉晉生禦寇禦寇生悼子醫是又生則爲卿大夫死則賜諡與立勳諸臣亦無以異至漢時而法已漸嚴有罪之家不得入宿衛其後并不得官京師是也然究當以漢法爲善

春秋時君臣上下同名不甚諱諱論

春秋時禮法尙疎雖云以諱事神名終將諱之然君臣上下同名者甚衆如周穆王名滿而周有王孫滿厲王名胡而五世孫厲王亦名胡齊鄭世家武公名掘突而其孫厲公亦名突簡公名嘉而同時即有公子嘉左傳史記並同宋穆公名與夷而一傳即有公子目夷衛世家穆公名遫而裔孫成侯亦名遫靈公時又有戲陽遫襄公名惡而臣又各石惡是又祖孫上下同名左傳宣十七年經蔡侯申卒至哀公四年經盜殺蔡侯申是元孫與高祖同名齊世家武公名壽而春秋時齊有公子壽曹世家有夷伯喜而後又有公子喜時有幽伯彊而數傳又有宣公彊又有大夫公孫彊陳世家有幽公寧而後又有大夫孔寧有武公靈而裔孫平國又證靈公晉世家唐叔子晉侯燮而范文子亦名燮定公名午而同時大夫有邯鄲午蒲城午又文公昭公

子皆名雍宋微子啓爲宋始祖而春秋傳宋景公所養子亦名啓楚靈王名圍而一傳即有王孫圉聘于晉見楚語至若魯武公名敖至廢敖山可云諱之嚴矣然文公時即有公孫敖他若晉曲沃桓叔名成師而晉官有太師魯幽公名宰而魯官有太宰楚共王名箴而官不廢箴尹晉獻侯名籍而晉不廢籍氏魯魏公名釐而魯邑之費不改陳莊公名林而陳地之株林不改此類益多不能枚舉矣又如以國號爲名者衛宣公名晉成公名鄭魯定公名宋陳惠公名吳之類當時赴告于諸國者又豈能連他國之號而諱之耶明春秋時雖以諱事神而禮法闕疎尙有諱有不諱非如漢以後禁忌日甚并同聲之字而亦諱之也

春秋時楚國人文最盛論

春秋時人材惟楚最盛其見用于本國者不具論其波及他國者蔡聲子言之已詳亦不復述外此則百里奚霸秦伍子胥霸吳大夫種范蠡霸越皆楚人也劉向新序百里奚楚宛人吳越春秋范蠡楚宛縣三戶人大夫種亦楚人他若文采風流楚亦較勝他國不獨左史倚相能讀三墳五典八索九丘也史記楚世家析父善言故事楚語共王傅士亹能通訓典六藝觀射父能辯山川百神蓋楚之先賢熊爲周文王師著鬻子二十二篇其後即諸子百家亦大半出于楚史記老子楚苦縣厲鄉曲仁里人老萊子亦楚人漢書藝文志道家老萊子十六篇楚人又文子九篇班固注老子弟子並與孔子同時今讀其書有與平王問答篇蓋楚平王班固以爲周平王誤也又有蜎子十三篇班固注名淵楚人老子弟子蜎冠子一篇注楚人居深山以鷗爲冠楚子三篇不注姓名又孔子墨子皆嘗入楚矣史記孔子弟子列傳公孫龍任不齊秦商鄭康成注皆楚人藝文志公孫龍十六篇即爲堅白之論者儒林傳滑臺子羽居楚至莊子雖宋蒙縣人而蹤跡多在楚觀本傳及越世家等可見孟子列傳載環淵楚人著